

**Landesbibliothek Oldenburg**

**Digitalisierung von Drucken**

**Bibliotheca Smithiana, Seu Catalogus Librorum D. Josephi  
Smithii Angli Per Cognomina Authorum Dispositus**

**Pasquali, Giovanni Battista**

**Venetiis, 1755**

Amnte Vitam Solonis

**urn:nbn:de:gbv:45:1-844**

## ANTE VITAM SOLOIS

*Vertente eodem Lapo Florentino.*

SÆPE numero veteres sapientissimos Philosophos mecum repetens, admirari soleo [ 1 ] Beatissime Pater, nec parum dubitare, quæ causa illos tanta impulerit, ut in suis Civitatibus, cum & honoribus maximis & copiis amplissimis abundarent, a Republica & a negotiis animi quodam iudicio abhorrentes, iis omnibus exagitatis atque contemptis tanquam in tutissimum & tranquillissimum vitæ portum in otium solitudinemque confugerent. Sed cum diligentius cogito, quantum ii suis studiis laboribusque profecissent, magna mihi ac multo maxima pars admirationis præciditur, nec eos solum divina aliqua sapientia, verum etiam præcipua quadam in nos benevolentia fuisse arbitror. Nam & ipsi dum viverent, se se consilio prudentiaque sua nonnunquam in dubiis casibus & amicis & Patriæ profuere, & ceteros, quo prodesse possent, suis doctrinis atque artibus instruxerunt: ut Clazomenius ille Anaxagoras Periclem Atheniensem; Siracusanum Dionem, Plato; Pithagoreus Lisias, Thebanum Epaminondam; alique complures alios, qui omnes vel Principes Civitatum, vel summi belli Duces extiterunt. Nec vivi solum, verum etiam post mortem hoc idem suis scriptis & monumentis consequuti sunt; ut facile appareat, illos non ob inertiam & desidiam se a laboribus amovisse, sed suum omne studium & laborem ad nostrum commodum utilitatemque contulisse. Quæ quidem cum hanc inanem admirationem & dubitationem meam nec homine erudito dignam magna jam ex parte minuissent, tu sustulisti funditus; qui cum his rebus omnibus, quibus illi in primis assueres, eorum ne dicam imitatione non enim contempsisti, ut ii fecerunt, nec profudisti, afflatu quodam impulsuque divino amplissimum patrimonium sublevandis inopibus, in liberalitate totum, & beneficentia posuisti; ut solutus & liber ab omnibus pietate ac religione veram illam & perfectam felicitatem, quam superiores Philosophi decepti opinionibus, & inanis gloriæ cupiditate adducti cum quærerent nec noverunt, nec reperire quidem potuerunt; & tu invenires, & fruerere. Quibus tantam de te expectationem sanctitatis integritatisque concitasti, ut non modo ea, quam sequebaris, beatitudine dignus omnibus viderere, verum etiam inde vel invitatus ad amplissimum dignitatis gradum omnium Gentium & Populorum consensu & voluntate revocatus, apertissime declarasti nec inane, nec stultum eorum studium esse, qui in otio & solitudine vivendum sibi statuissent. Nam simulac creatus es Pontifex, statim Romanam Ecclesiam prostratam & afflictam superioris morte Pontificis te sceleratissimorum latronum armis undique circumventum consilio, sapientia, animi magnitudine eripuisti, & in pristinum statum dignitatemque vindicasti; asperrimos & immanissimos hostes partim conciliasti tibi, partim sui similibus oppressisti, christianos Populos non solum dissidentes armis, sed etiam male sentientes & præsens & per Legatos tuos edocere, & ad veram religionem reducere conatus es. A te etiam tenues atque inopes, & præsertim eruditi viri tuis opibus & copiis assidue sustentati,

[ 1 ] Scil. Xystus IV. Savonensis Ord. Min. Convent. alamanus.